

AKTA JALAN PARIT DAN BANGUNAN 1974

UNDANG-UNDANG KECIL KERJA TANAH (MAJLIS PERBANDARAN TAIPING) 1990

PADA menjalankan kuasa-kuasa yang diberi oleh subseksyen (17) seksyen 70A Akta Jalan, Parit dan Bangunan 1974, Majlis Perbandaran Taiping membuat undang-undang kecil berikut:

BAHAGIAN I PERMULAAN

1. Undang-undang kecil ini bolehlah dinamakan Undang-Undang Kecil Kerja Tanah (Majlis Perbandaran Taiping) 1990.
2. Undang-Undang kecil ini hendaklah dipakai hanya bagi kawasan Majlis Perbandaran Taiping sahaja.
3. Dalam undang-undang kecil ini, melainkan jika kandungan ayatnya menghendaki makna yang lain –

“Akta itu” ertinya Akta Jalan, Parit dan Bangunan 1974;

“jurutera” ertinya seorang Jurutera Profesional yang didaftarkan di bawah Akta Pendaftaran Jurutera, 1967 dan menjalankan amalan dengan kelulusan bertulis daripada Lembaga Jurutera;

"kenderaan" hendaklah mempunyai erti yang diberikan kepadanya di bawah Akta Pengangkutan Jalan 1987;

"kerja tanah" hendaklah mempunyai erti yang sama seperti yang diberi kepadanya di bawah seksyen kecil (18) seksyen 70A Akta itu;

"kerja tanah asas tapak" termasuklah pembinaan asas tapak, tingkat bawah tanah, binaglas, tambatan bumi, cerucuk, batusendi dan peparit;

"kerja tanah kecil" ertinya mana-mana kerja tanah seperti yang ditetapkan dalam Jadual Kedua;

"Majlis" ertinya Majlis Perbandaran Taiping; dan

"Yang Dipertua" ertinya Yang Dipertua Majlis Perbandaran Taiping.

BAHAGIAN II MENGEMUKAKAN PELAN-PELAN

4. (1) Pelan-pelan berhubung dengan kerja tanah yang dikehendaki dikemukakan di bawah seksyen 70A Akta itu hendaklah dikemukakan bersama-sama dengan borang permohonan dalam Borang A Jadual Ketiga dan hendaklah disertakan dengan fee seperti yang ditetapkan dalam Jadual Pertama dan hendaklah mengandungi butir-butir yang dikehendaki di bawah undang-undang kecil ini.

(2) Pelan-pelan itu hendaklah dikemukakan setelah ditandatangani dengan sempurna oleh seorang jurutera yang mempunyai kelulusan dalam kejuruteraan awam dan hendaklah—

(a) mengandungi suatu perakuan yang dibuat olehnya menyatakan bahawa penentuan-penentuan dan butir-butir yang terkandung di dalamnya adalah betul; dan

(b) ditandatangani oleh pemunya tanah yang berkenaan itu atau ejennya yang diberikuasa olehnya secara bertulis dan hendaklah menggunakan alamat penuh pemunya itu atau ejen itu mengikut mana yang berkenaan.

(3) Pelan-pelan dan penentuan-penentuan yang diluluskan oleh Yang Dipertua boleh dikemukakan semula untuk dipinda atau diubah tetapi dalam hal yang demikian kehendak-kehendak di bawah perenggan (2) hendaklah *dipakai mutatis mutandis*.

(4) Melainkan jika kerja tanah dimulakan dalam masa dua belas bulan selepas perakuan semua pelan dan spesifikasi berhubung dengan itu yang dikehendaki di bawah undang-undang kecil 7, perakuan pelan dan spesifikasi tersebut hendaklah berakhir pada tarikh penghabisan tempoh yang diperkatakan tetapi Majlis atas permohonan yang dibuat kepada Majlis sebelum tarikh penghabisan tempoh yang diperkatakan, boleh melanjutkan tempoh tidak melebihi dua belas bulan, tertakluk kepada separuh bayaran yang ditentukan di bawah Jadual Pertama.

5. (1) Jurutera yang mengemukakan pelan-pelan itu di bawah undang-undang kecil 4 hendaklah bertanggungjawab atas pelaksanaan yang sempurna akan kerjatanah itu dan hendaklah terus bertanggungjawab sedemikian sehingga selesai kerjatanah itu melainkan jika—

(a) dengan persetujuan Yang Dipertua, seorang jurutera lain dilantik untuk mengambilalih; atau

(b) Yang Dipertua bersetuju jurutera itu menarik diri.

(2) Jika Yang Dipertua bersetuju menerima penarikan diri seseorang jurutera di bawah perenggan (1)(b) kerja tanah itu tidak boleh dimulakan atau diteruskan sehingga seorang lain dilantik untuk mengambilalih.

(3) Jurutera yang mengemukakan pelan-pelan hendaklah menjalankan penyeliaan-penyeliaan dan membuat apa-apa pemeriksaan yang perlu untuk memastikan kerja tanah itu dijalankan mengikut pelan-pelan, penentuan-penentuan, arahan-arahan, pindaan-pindaan atau syarat-syarat yang dikenakan oleh Yang Dipertua dan pada amnya mengikut peruntukan-peruntukan undang-undang kecil ini.

(4) Jurutera yang mengemukakan pelan-pelan hendaklah sebelum memulakan kerja tanah itu memberitahu Yang Dipertua dalam Borang B Jadual Ketiga di atas keinginan memulakan kerja tanah itu.

(5) Jurutera yang mengemukakan pelan-pelan itu hendaklah dalam masa satu minggu selepas selesai kerja tanah itu memberitahu kepada Yang Dipertua dan mengesahkan dalam Borang D Jadual Ketiga bahawa kerjatanah itu telah selesai.

(6) Perenggan (1) undang-undang kecil ini tidak boleh ditafsirkan sebagai melepaskan tanggungjawab seseorang daripada peruntukan-peruntukan seksyen 71 Akta itu.

(7) Walaupun mana-mana pelan, lukisan atau kiraan-kiraan telah diluluskan oleh Yang Dipertua, tanggungjawab kerana kegagalan pada mana-mana bahagian kerjatanah itu hendaklah *prima facie* terletak atas orang yang mengemukakan pelan, lukisan atau kiraan-kiraan tersebut.

(8) Bagi maksud undang-undang kecil ini ungkapan “jurutera yang mengemukakan pelan-pelan itu” adalah termasuk jurutera yang mengemukakan semula pelan-pelan dan mana-mana jurutera yang dilantik untuk mengambil alih.

6. (1) Semua pelan hendaklah dikemukakan dalam tiga salinan.

(2) Semua pelan hendaklah dibuat dengan warna hitam dengan perbezaan-perbezaan bahan ditunjukkan dengan warna.

7. Melainkan jika dikecualikan oleh Yang Dipertua, pelan-pelan penentuan-penentuan dan butir-butir berikut hendaklah dikemukakan:

(1) Suatu pelan tapak yang dibuat mengikut skala yang tidak kurang daripada 1:1000 menunjukkan dengan warna jelas, tapak kerjatanah, jalan masuk, alur utama, alur air semulajadi, parit dan tanah-tanah yang bersambungan atau bahagian daripada dan menunjukkan skala yang digunakan serta tanda arah utara;

(2) Pelan-pelan pada kontur satu meter yang menunjukkan tanah di mana kerja tanah itu akan dijalankan dan juga tanah yang bersambungan dengannya, mengikut skala tidak kurang daripada 1:500;

(3) Pelan-pelan mengikut skala tidak kurang 1:500 menunjukkan -

(a) Aras siap pembentukan termasuklah -

- (i) aras platform untuk bangunan atau bangunan;
 - (ii) aras siap jalan;
 - (iii) aras dasar parit dan lintasan;
 - (iv) tempat alir keluar saliran;
- (b) tutupan atau lencongan bagi mana-mana alur utama dan alur air semulajadi atau pembaikan-pembaikan padanya;
- (c) apa-apa pengorekan, pemotongan atau penimbunan melebihi dua meter dalam atau tinggi;
- (d) perlindungan bagi kerjatanah itu daripada hakisan, termasuk perlindungan semasa kerjatanah itu berterusan;
- (e) peruntukan penahan enap, termasuk peruntukan semasa kerjatanah itu berterusan.
- (4) Cara pengorekan, peralatan, penimbunan, cerucuk perlindungan atau apa-apa proses teknikbumi yang lain;
- (5) Jadual bagi kerja tanah dan susunan dalam mana kerja tanah itu diperingkat-diperingkatkan;
- (6) Banyaknya tanah yang hendak dikorek atau ditimbus dan tempat di mana tanah yang dikorek itu hendaklah diletakkan atau tanah yang hendak digunakan untuk penimbunan itu hendaklah didapatkan dan disertai dengan kelulusan yang diberi oleh pihak berkuasa yang berkenaan bagi memindahkan tanah itu;
- (7) Langkah-langkah yang diambil untuk manghalang kenderaan yang membawa tanah daripada mengotorkan jalan-jalan yang bersebelahan;
- (8) Langkah berjaga-jaga yang diambil bagi melindungi tanah, bangunan, jalan dan lain-lain harta yang bersambungan;
- (9) Pelan-pelan terperinci mengikut skala tidak kurang daripada 1:50 dan penentuan-penentuan dan kiraan-kiraan bagi cerucuk sasak keping atau lain-lain struktur penahan atau penstabilan cerun yang dikehendaki oleh undang-undang kecil ini; dan
- (10) Jika berkaitan, kiraan-kiraannya dan segala aras bumi dan kontur yang tersebut dalam undang-undang kecil ini hendaklah dibuat dengan merujuk kepada paras datum ordinan.
8. Pelan-pelan dan penentuan-penentuan yang dikehendaki di bawah undang-undang kecil 7 boleh dengan kebenaran Yang Dipertua, dikemukakan secara berasingan tetapi dalam hal yang demikian itu perakuan yang dikehendaki di bawah undang-undang

kecil 4 hendaklah disertakan juga dengan tiap-tiap satu set pelan dan penentuan yang kemudiannya.

Dengan syarat bahawa tiada apa-apa kerjatanah boleh dimulakan sehingga semua pelan dan penentuan yang dikehendaki di bawah undang-undang ini telah diluluskan.

9. Jika kerja cerucuk dicadangkan, pelan-pelan dikemukakan di bawah undang-undang kecil 7 hendaklah juga mengandungi –

(a) pelan mengikut skala yang tidak kurang daripada 1 nisbah 50 dan spesifikasi bahan untuk cerucuk itu dan cara untuk menjalankan kerja cerucuk itu; dan

(b) suatu perakuan dibuat oleh jurutera memperakui bahawa paras bunyi akibat daripada kerja-kerja cerucuk itu tidak akan membangkitkan kemarahan dan kacau ganggu kepada penduduk di kawasan sekelilingnya.

10. Jika diarah oleh Yang Dipertua, jurutera hendaklah mengawas paras bunyi akibat daripada kerja-kerja cerucuk dan laporan mingguan mengenai pengawasan itu hendaklah diperakui olehnya dan dikemukakan kepada Yang Dipertua.

11. (1) Di mana jua berkenaan, pelan-pelan, penentuan-penentuan dan kiraan-kiraan yang dikemukakan di bawah undang-undang kecil ini hendaklah menepati tatasusila-tatasusila amalan yang berikut seperti yang dipinda dari semasa ke semasa:

(a) Penyiasatan tapak – British Standard Code of Practice 2001;

(b) Kerja tanah – British Standard Code of Practice 2003;

(c) Asas Tapak – British Standard Code of Practice 2004;

(d) Civil Engineering Code of Practice no. 2 on Earth Retaining Structures yang dikeluarkan oleh Institute of Structural Engineers, United Kingdom; dan

(e) Asas dan bina galas bagi bangunan-bangunan bukan perindustrian yang tidak melebihi 4 tingkat – British Standard Code of Practice 101.

(2) Jika ada dikeluarkan satu Tata amalan Piawaian Malaysia yang bersamaan selepas mula berkuat kuasa Undang-Undang Kecil ini, ia hendaklah menggantikan British Standard Code of Practice mengenai hal perkara yang sama dan hendaklah dipatuhi.

BAHAGIAN III
PERUNTUKAN-PERUNTUKAN KHAS BERHUBUNG DENGAN KERJA TANAH
ASAS TAPAK

12. (1) Sisi-sisi bagi semua kerja tanah asas tapak hendaklah dilindungi dengan cerucuk sasak keping keluli atau dengan lain-lain cara perlindungan jika Yang Dipertua berpuas hati dan penentuan-penentuan dikemukakan kepadanya bahawa cara perlindungan alternatif itu adalah sama berkesannya atau lebih baik dan akan memberi perlindungan yang mencukupi bagi harta-harta yang bersambungan.

(2) Kehendak-kehendak di bawah perenggan (1) boleh dikecualikan jika Yang Dipertua berpuashati bahawa perlindungan itu adalah tidak perlu.

13. Penyiasatan tanah hendaklah dijalankan dan aras mata air dalam mana-mana kerja tanah asas tapak hendaklah ditentukan; dan jurutera yang mengemukakan pelan-pelan di bawah undang-undang kecil 4 hendaklah mengemukakan laporan-laporan penyiasatan tanah dan hendaklah mengemukakan laporan penyiasatan tanah dan hendaklah memperakui bahawa apa-apa perendahan aras mata air tidak akan menyebabkan kerosakan kepada mana-mana struktur, jalan atau mana-mana harta lain di sekelilingnya.

BAHAGIAN IV
PERUNTUKAN-PERUNTUKAN BERHUBUNG DENGAN KERJA TANAH AM

14. Jika kerja pecah batu hendak dijalankan di atas tapak kerja tanah, suatu permohonan berasingan secara bertulis hendaklah dibuat oleh jurutera kepada Yang Dipertua untuk mendapatkan kelulusan.

15. Jika ada pokok-pokok di atas tapak kerja tanah, pokok-pokok itu tidak boleh ditebang atau diterangkan sehingga tapak kerja tanah itu telah sedia untuk diusahakan.

16. (1) Semua kerja tanah yang melebihi tiga meter tinggi atau dalam hendaklah dilindungi dengan suatu struktur penahan atau penstabilan cerun melainkan jika dikecualikan oleh Yang Dipertua.

(2) Mengenai kerja tanah di mana struktur penahan atau penstabilan cerun kekal adalah dikecualikan dengan struktur penahan atau penstabilan cerun sementara dalam masa berterusnya kerja tanah itu melainkan jika dikecuali oleh Yang Dipertua.

17. Kerja tanah yang hendak dijalankan hendaklah di peringkat-peringkat mengikut susunan yang dikemukakan di bawah undang-undang kecil 7 (6) dan tiada apa-apa kerja tanah boleh dimulakan atau diteruskan ke peringkat yang berikutnya melainkan jurutera yang mengemukakan pelan-pelan itu memperakui secara bertulis bahawa kerja tanah itu tidak mungkin menyebabkan kacau ganggu atau kerosakan kepada harta benda di sekelilingnya.

18. Yang Dipertua boleh, pada bila-bila masa sebelum sesuatu kerja tanah boleh diteruskan ke peringkat yang berikutnya, menghendaki -

- (a) disalir dan dilencongkan alur utama dan alur air semulajadi termasuk mengadakan permatang dan pembentung dengan cukup;
- (b) supaya penahan-penahan enap diadakan dengan cukup serta diselenggara dengan sepatutnya;
- (c) supaya struktur penahan diadakan di mana perlu;
- (d) supaya cerun-cerun dilindungi secukupnya daripada hakisan;
- (e) supaya ada tapak jalan dibina dan permukaan jalan itu disendal bagi mengelakkan enap daripada dihanyutkan ke dalam alur air yang sedia ada;
- (f) supaya timbusan-timbusan dipadatkan.

BAHAGIAN V PELBAGAI

19. Yang Dipertua boleh, jika ia fikirkan perlu, menghendaki pelan-pelan, penentuan-penentuan dan butir-butir lanjut dikemukakan atau memberi arahan-arahan lanjut atau membuat pindaan-pindaan lanjut kepada pelan-pelan itu atau mengenakan syarat-syarat lanjut yang ia fikirkan patut dan arahan-arahan, pindaan-pindaan atau syarat-syarat itu hendaklah dipatuhi.

20. Semua bahan-bahan yang hendak diangkut kepada dan/atau dari tapak kerja tanah hendaklah diletakkan di suatu tempat yang ditentukan dan mengikut arahan dan syarat-syarat yang dikenakan oleh Yang Dipertua.

21. Tiap-tiap orang yang menggunakan apa-apa kenderaan untuk mengangkut bahan-bahan kepada dan/atau dari mana-mana tapak kerja tanah hendaklah mendapatkan permit daripada Yang Dipertua dan hendaklah –

- (i) memastikan bahawa badan kenderaan itu dalam keadaan yang baik dan tiada ada celah atau lubang dari mana bahan-bahan boleh jatuh;
- (ii) memastikan bahawa bahan-bahan tidak diisi dalam kenderaan itu melebihi ketinggian sisi-sisi kenderaan itu;
- (iii) menutup bahan-bahan dengan kain tarpal, plastik. Kanvas atau lain-lain bahan yang sesuai;
- (iv) memastikan bahawa roda-roda dan tayar-tayar kenderaan itu dibersihkan sebelum kenderaan itu dibenarkan masuk ke mana-mana jalan atau tempat awam; dan

- (v) menggunakan jalan-jalan yang ditetapkan oleh Yang Dipertua dan mematuhi semua syarat-syarat lain yang ditentukan oleh Yang Dipertua.

22. (1) Sesuatu pelan yang telah diluluskan boleh diperiksa di Pejabat Yang Dipertua dengan membayar fi seperti yang ditetapkan dalam Jadual Pertama.

(2) Dengan kelulusan bertulis orang yang mengemukakan pelan-pelan dan dengan membayar fi yang ditetapkan dalam Jadual Pertama, pelan-pelan boleh disalin dan pelan-pelan itu boleh diperakui sebagai salinan yang benar dengan membayar fi yang ditetapkan dalam Jadual itu.

23. Sesiapa jua yang -

- (a) dengan diketahuinya atau dengan cuai mengemukakan pelan-pelan, penentuan-penentuan, kiraan-kiraan atau butir matan atau memberi perakuan yang dikehendaki di bawah Jadual Kedua secara palsu;
- (b) tanpa sebab yang munasabah tidak mematuhi apa-apa arahan, pindaan atau syarat yang diberi atau dikenakan di bawah undang-undang kecil ini;
- (c) tanpa sebab yang munasabah tidak memberi notis yang dikehendaki di bawah undang-undang kecil 5(4) dan 5(5); atau
- (d) melanggar apa-apa peruntukan undang-undang kecil ini;

adalah bersalah atas suatu kesalahan di bawah undang-undang kecil ini dan boleh didenda sebanyak tidak melebihi dua ribu ringgit dan, bagi sesuatu kesalahan yang berterusan, tidak melebihi satu ratus ringgit bagi tiap-tiap satu hari kesalahan itu diteruskan."

24. Undang-undang kecil ini tidak dipakai bagi -

- (a) kerja tanah yang dijalankan di bawah mana-mana undang-undang bertulis berhubung dengan lombong;
- (b) kerja tanah yang dijalankan bagi maksud-maksud pertanian;
- (c) kerja tanah kecil seperti yang ditentukan dalam Jadual Kedua, dengan syarat bahawa butiran 4,5 dan 6 pengecualian hanya diberi jika jurutera mengemukakan suatu perakuan dalam Borang C Jadual Ketiga dan diluluskan oleh Yang Dipertua.

“JADUAL PERTAMA
BAYARAN

1.	Kerja tanah asas tapak hingga beberapa dalam di bawah aras yang sedia ada yang tinggi sekali	RM10.00 bagi tiap-tiap satu meter padu tanah yang terlibat, dengan suatu bayaran minimum RM50.00.
2.	Kerja tanah am	RM50.00 tiap-tiap ½ hektar atau sebahagian daripadanya.
3.	Melanjutkan tempoh keesahan	20% fi asal
4.	Pemeriksaan pelan yang telah diluluskan	RM6.00
5.	Menyalin satu set pelan-pelan dengan kelulusan orang yang mengemukakannya	RM24.00
6.	Memperakui salinan yang benar satu set pelan-pelan	RM10.00
7.	Pindaan kepada pelan yang diluluskan	Fi minimum sebanyak RM50.00 beserta dengan fi yang ditentukan bagi sebarang kuantiti tambahan meter isi padu tanah yang terlibat (bagi kerja tanah asas) daripada kawasan tambahan yang terlibat (untuk kerja tanah amnya)

JADUAL KEDUA
(Undang-Undang Kecil 3 dan 24)
KERJA TANAH KECIL

1. Mengorek untuk landskap tanpa struktur sedalam tidak melebihi tiga meter.
2. Mengorek untuk menanam atau membantun pokok-pokok atau tiang-tiang sedalam tidak melebihi tiga meter.
3. Mengorek untuk pembinaan lurang dan memasang paip sedalam tidak melebihi tiga meter.
4. Mengorek untuk lubang asas tapak tidak melebihi tiga meter kali tiga meter untuk bangunan kediaman yang sekurang-kurangnya tiga meter jauh dari sempadan dan tidak melebihi tiga meter ke dalam.
5. Mengorek untuk asas tapak yang tidak melebihi tiga meter ke dalam jikalau pengorekan itu bukan untuk maksud pembinaan tingkat bawah dan di situ ada bangunan di harta bersebelahan.
6. Mengorek dalam tapak tidak melebihi tiga meter ke dalam dan melebihi tiga meter jauh dari sempadan dan untuk pengorekan itu cerucuk tidak dikehendaki.
7. Untuk butiran-butiran 4,5 dan 6, pengecualian akan diberi hanya jika jurutera mengemukakan suatu perakuan dalam Borang C Jadual Ketiga dan diluluskan oleh Yang Dipertua.

JADUAL KETIGA

BORANG-BORANG

**AKTA JALAN, PARIT DAN BANGUNAN 1974
UNDANG-UNDANG KECIL KERJA TANAH (MAJLIS PERBANDARAN TAIPING) 1990**

BORANG A

**MENGEMUKAKAN PELAN-PELAN UNTUK KERJA TANAH
(Undang-undang Kecil 4 (1))**

Yang Dipertua, Majlis Perbandaran Taiping.

Saya/kami dengan ini memohon untuk kerja yang dicadangkan berikut:

.....
.....

bagi pihak (Nama Pemunya/Pemaju).....
.....

Lukisan No.....
kiraan-kiraan dan penentuan-penentuan adalah dikemukakan bersama-sama ini dalam dua salinan.

Saya dengan ini bertanggungjawab sepenuhnya untuk rekabentuk-rekabentuk, penentuan-penentuan dan perjalanan kerja tersebut.

Tandatangan
Nama
Profesion
Alamat
No. Pendaftaran Lembaga Jurutera:
.....

Tarikh

Yang Dipertua, Majlis Perbandaran Taiping.

Saya/Kami pemunya/pemaju projek yang tersebut di atas dengan ini mengesahkan bahawa jurutera:

Nama

No. Pendaftaran Lembaga Jurutera-Jurutera:

Alamat

telah dilantik untuk mengemukakan pelan-pelan bagi pihak saya/kami.

Saya/Kami dengan ini berakujanji seperti berikut:

1. Nama dan alamat jurutera yang bertanggungjawab untuk menyelia kerja akan dikemukakan kepada, tuan sebelum permulaan kerja tersebut.
2. Saya/Kami akan mematuhi dengan sepenuhnya kehendak Akta Jalan, Parit dan Bangunan 1974 dan Undang-undang Kecil Kerja Tanah (Majlis Perbandaran Taiping) 1990.
3. Pegawai-pegawai Majlis berhak untuk memasuki pada bila- bila masa yang munasabah untuk memeriksa kerja, stor bahan-bahan dan tapak di mana kerja itu dijalankan.
4. Saya/Kami akan bersesama dan berasingan bertanggungjawab dengan jurutera bagi apa-apa kerosakan harta-harta dan lain- lain yang akibat daripada pembinaan kerja tersebut.

Tandatangan

Nama

Alamat

.....

.....

Tarikh

**AKTA JALAN, PARIT DAN BANGUNAN 1974
UNDANG-UNDANG KECIL KERJA TANAH (MAJLIS PERBANDARAN TAIPING) 1990**

BORANG B

**NOTIS MEMULAKAN KERJA TANAH
(Undang-undang Kecil 5 (4))**

..... 19.....

Yang Dipertua, Majlis Perbandaran Taiping.

Saya memberi notis bahawa selepas tamat tempoh empat hari dari tarikh notis ini diterima saya bercadang untuk memulakan kerja tanah iaitu:

.....
atas Lot/Lot-lot
Seksyen/Mukim
Jalan
bagi
menurut Pelan Yang Diluluskan No.....

Bertarikh

.....
Jurutera yang mengemukakan

Nama
Profesion
Alamat
No. Pendaftaran Lembaga Jurutera-Jurutera:
.....

**AKTA JALAN, PARIT DAN BANGUNAN 1974
UNDANG-UNDANG KECIL KERJA TANAH (MAJLIS PERBANDARAN TAIPING) 1990**

BORANG C

**PERAKUAN KERJA TANAH KECIL
(Undang-undang Kecil 24 (c))
(Dikemukakan Dalam Dua Salinan)**

Yang Dipertua, Majlis Perbandaran Taiping.

Saya memperakui bahawa kerja penggalian yang akan dijalankan atas lot/lot-lot.....

Seksyen/Mukim.....

Jalan.....

bagi

.....

ialah kerja tanah yang bersifat kecil menurut Jadual Kedua Undang-undang Kecil Kerja tanah (Majlis Perbandaran Taiping) 1990.

2. Saya difahamkan bahawa pengecualian dari kehendak-kehendak Undang-undang Kecil Kerja tanah (Majlis Perbandaran Taiping) 1990 tidak akan melepaskan saya dari tanggungjawab ke atas mana-mana pihak untuk kerosakan yang disebabkan oleh kerja tanah tersebut.

3. Saya bersetuju juga menggantirugi dan terus menggantirugi Majlis Perbandaran Taiping untuk apa-apa tuntutan, kerosakan, kerugian, tindakan atau prosiding yang boleh diambil terhadapnya yang disebabkan oleh dan akibat daripada kerja tanah tersebut.

Tarikh.....

.....

Jurutera

Nama

Profesion

Alamat

No. Pendaftaran Lembaga Jurutera-Jurutera:

.....

Dengan pengesahan yang diberi oleh orang yang mengemukakan perkara yang tersebut di atas, saya dengan ini bersetuju mengecualikan kerja-kerja tersebut dari peruntukan undang-undang kecil ini. Ianya adalah kerja tanah yang bersifat kecil menurut Jadual Kedua Undang-undang Kecil Kerja tanah (Majlis Perbandaran Taiping) 1990.

Tarikh

.....
Yang Dipertua
Majlis Perbandaran Taiping

**AKTA JALAN, PARIT DAN BANGUNAN 1974
UNDANG-UNDANG KECIL KERJA TANAH (MAJLIS PERBANDARAN TAIPING) 1990**

BORANG D

**NOTIS DAN PENGESAHAN PENYEMPURNAAN KERJA TANAH
(Undang-undang Kecil 5 (5))**

..... 19.....

Yang Dipertua, Majlis Perbandaran Taiping.

Adalah dimaklumkan bahawa kerja tanah yang dibuat di lot/lot-lot
.....Seksyen/Mukim.....
Jalan.....
bagi.....
.....
telah siap menurut pelan yang diluluskan No.....
Bertarikh.....

2. Saya memperakui bahawa saya telah mengawasi kerja tanah tersebut dan sepanjang pengetahuan dan kepercayaan saya, kerja- kerja itu adalah menurut Pelan-pelan Yang Diluluskan dan saya setuju terima tanggungjawab sepenuhnya dengan sewajarnya ke atas bahagian-bahagian yang baginya saya adalah berkenaan.

.....
Jurutera

Nama
Profesion
Alamat
No. Pendaftaran Lembaga Jurutera-Jurutera:
.....

Diperbuat pada 27hb Julai 1989.
[MP.TPG.A1/10/5/7; PU.Pk.23/75]

.....
DATO' ISMAIL BIN SHAH BODIN

Yang Dipertua
Majlis Perbandaran Taiping
Perak Darul Ridzuan